



Kompleks Fakulti Perubatan Veterinar Dirasmikan – Miliki Hospital Termoden Asia Tenggara



SERDANG, 1 NOV – Kompleks Fakulti Perubatan Veterinar yang menempatkan Hospital Veterinar Universiti (UVH) Universiti Putra Malaysia (UPM), iaitu hospital veterinar baru yang pertama di Malaysia dan memiliki kemudahan moden tercanggih di Asia Tenggara dirasmikan hari ini.

Timbalan Naib Canselor (Penyelidikan dan Inovasi), Prof. Ir. Dr. Mohd. Saleh Jaafar dalam ucapannya berkata hospital itu juga merupakan hospital pengajaran veterinar pertama di Malaysia dan dilengkapi dengan kemudahan mengikut piawaian veterinar antarabangsa.

Katanya hospital itu merangkumi Unit Haiwan Besar, Unit Haiwan Kesayangan, surgery, 12 makmal diagnosis, 7 dewan bedah, klinik bergerak, unit farmasi serta unit radiologi dan pengimejan.

“Wad haiwan besar dan wad haiwan kesayangan, masing-masing boleh merawat 40 ekor dan 80 ekor haiwan dan berupaya merawat haiwan sebanyak 50 kes sehari. Orang awam boleh mendapatkan perkhidmatan di hospital ini mulai jam 8.30 pagi hingga 4.30 petang setiap hari kecuali klinik bergerak selama 24 jam.

“Seramai 50 orang pakar runding, 22 pegawai veterinar dengan 60 staf sokongan pelbagai kategori berkhidmat di hospital ini yang telah memulakan operasi di kompleks baharu pada Januari lalu,” katanya mengenai hospital yang dibina dengan kos RM28 juta seluas 5,158 meter persegi.

Sementara itu Menteri Pengajian Tinggi, Dato' Seri Mohamed Khaled Nordin yang merasmikan Kompleks Fakulti Perubatan Veterinar yang turut menempatkan UVH berkata hospital yang memberikan perkhidmatan berkelas antarabangsa itu telah mencatatkan peningkatan kes klinikal sebanyak 10 peratus kepada 16,829 kes pada tahun lalu berbanding tahun sebelumnya dengan kenaikan perolehan pendapatan sebanyak 3.5 peratus.

“Fakulti Perubatan Veterinar menerusi Hospital Veterinar Universiti berpotensi mempelopori secara holistik keperluan negara menangani penyakit berjangkit haiwan yang boleh memberi kesan kepada manusia selain perkhidmatan khas dalam perubatan veterinar, surgery serta makmal diagnosis.



“Kebolehpasaran graduan Fakulti Perubatan Veterinar juga amat tinggi. Sebagai contoh Jabatan Perkhidmatan Veterinar, Malaysia pada hari ini masih memerlukan 120 veterinawan untuk memenuhi jawatan yang sudah lama kosong,” katanya.

Beliau juga mencadangkan kurikulum program veterinar Malaysia perlu diakreditasi pada peringkat antarabangsa untuk memastikan graduan Doktor Perubatan Veterinar Malaysia diiktiraf di seluruh dunia selain berharap Fakulti Perubatan Veterinar UPM menjadi fakulti bereputasi antarabangsa.

Dekan Fakulti Perubatan Veterinar, Prof. Madya Datuk Dr. Bashir Ahmad Fateh Mohamed berkata kompleks itu mengandungi Blok Akademik meliputi empat makmal pengajaran, 13 bilik tutorial, lima dewan kuliah, muzium anatomi, satu auditorium, makmal komputer, bilik seminar dan perpustakaan yang boleh menampung 1,000 pelajar termasuk staf.

“Pembinaan kompleks baharu itu secara keseluruhannya menelan kos sebanyak RM57 juta bertujuan menampung ruang pengajaran dan pembelajaran berikutan pertambahan bilangan pelajar serta memastikan ruang makmal dan tempat peralatan penyelidikan mencukupi,” katanya kepada wakil media.



Fakulti Perubatan Veterinar telah ditubuhkan pada tahun 1973 telah melahirkan ramai pakar dan doktor veterinar kepada negara dan memainkan peranan utama dalam transformasi keilmuan negara dalam bidang veterinar. Fakulti ini merupakan institusi pengajian tinggi pertama yang mempunyai persijilan dalam pengajaran, penyelidikan dan perkhidmatan profesional iaitu MS ISO 9001 pada tahun 2000 dan MS ISO/IEC 17025 pada tahun 2008.

Antara tokoh yang dilahirkannya ialah pemenang Anugerah Tokoh Akademik Negara 2010 Profesor Emeritus Tan Sri Datuk Dr. Omar Abdul Rahman dan pemenang Anugerah Tokoh

Akademik Negara 2007 Profesor Emeritus Tan Sri Dato' Dr. Syed Jalaluddin Syed Salim, selain tiga pegawai akademiknya telah memenangi Anugerah Akademik Negara 2010 baru-baru ini.

Pada majlis itu, dua memorandum persefahaman (MoU) ditandatangani antara Fakulti Perubatan Veterinar dengan Jabatan Perkhidmatan Veterinar Malaysia (JPV) dan World Wide Fund for Nature Malaysia (WWF Malaysia) dalam menjalankan aktiviti pengajaran, penyelidikan dan perkhidmatan. Timbalan Naib Canselor (Penyelidikan dan Inovasi) Prof. Ir. Dr. Mohd. Saleh Jaafar menandatangani bagi pihak UPM sementara Ketua Pengarah JPV, Datuk Dr. Abd. Aziz Jamaluddin menandatangani bagi pihak JPV dan Pengarah Eksekutif WWF Malaysia, Dato' Dr. Dionysius S. K. Sharma menandatangani bagi pihak WWF Malaysia.

Berita disediakan oleh Pejabat Pemasaran dan Komunikasi (MarComm) – Khairul Anuar Muhamad Noh (03-89467469), Foto oleh Marina Ismail (03-89466199)

Hak Cipta Terpelihara 2007
Universiti Putra Malaysia